

Basef Ifimba Pita Nagi' Nanda'afi

Basef bandafi fagagi'i Pita nanda'afi

1:1-2 Pita nasapa' dagala ananini naloma basef Godi ma esis Kristen
1:3-21 God nosaho'apa ananipai ma dei' monda' waf ananifi bu'wafi
hiafi migikila' mali' magape
2:1-22 Amom profet magambaso'ami manda' waf awafii ma anaf God
nogagwamam akafimi awami
3:1-16 Nemaf Dembinaii anaf fegataga ma hiahaom hiami higiligalam.
Ea' apa' mondanda' waf bu'wafi mondansasa.
3:17-18 Pita na'ipasa basef akutaifi ma fegewa' banagas

1 ¹Ae' Saimon Pita anda' maol Jisas Kraisi, anen nandandepe aposel.
Ae' anda'ago basef ifimba ma ipa' amam nematawa pegefa' hapif
fasini lu'wani na'amba atin si'i afa' ogofa'ani. Hapif inimba ipa' pefa'ana
waf bu'wafi hilili'i Jisas Kraisi, anen God ape'inai nowambelapa
mogotanimai.^a ²God natopalopepa dowaf ea' nanda' opalef ipe'ilifi
fape sa'ombel awanelef. Ae' a'i amamba mondape si'ima ipa' ma ufia'w
akwamba pegegawa God noloma Jisas Krais Dembinai ape'inai.^b

Godnofalapa nosaho'apa ma mogape ananipai atepa

³Krais nofalepa ma pefa' banagami mogogala'i ananimi atom
pegalomana. Ama banagami God nagaso'anami atom anen naso'apa fe'
bu'wani hiahaom amamba fasimi hi'alama mope andeande' mogaila
waf Godi. Krais nanda'apa na'amba ma ufia'w akwamba mogogawa
anen atona. ⁴Banagami mogogala'i amamba atom anen naso'apa basef
ananimi naga'i endilisi atinami. Basef amamba lu'wami fasimi a'owa!.
Basef amamba atom ipa' pataga la'ifipama pegefa' ambal namili ma waf
Godi pegalomana. Ama pefa' pefe' pindihi'ama hiahaom amamba awami

a 1:1 Ju 2 **b** 1:2 1 Pi 2:9

mataga manda' ukup pegehafel a'owa' ma waf awafii mape itap apa'e manda' epes awasii.

⁵Ipa' ukup pepoma hiahawes isimba pendanda' maol banagambel endilisi dondo' ma ikwafa pepel ipe'ini piwatania hapif ipe'ini penda' waf bu'wafi atef. Ea' piwatania waf afamba bu'wafi ma pegefa' gawa bu'wani.^c ⁶Ea' piwatania gawa inimba ma waf nomonas sondapaipa pimafi alop andeande' datima. Ea' piwatania waf pigimafi alopafi ma waf pigalutu banagepamafi, pegefa' nimanimi. Ea' piwatania waf pigalutu banagepamafi ma penda' waf pegasa'ma agol ananigili. ⁷Ea' waf afamba hiafi bu'wafi fagali'i piwataniaf feloma waf ukup pindaima atina sahin owanafi. Ea' waf afamba ukup pindaima atinafi piwatania waf bu'wafi pegatopalopa sahin owanafi.

⁸Ipa' pegawa Jisas Krais dembinai ape'inai anen kofagonama waf afambai hiafi hi'alaf. I'i waf afamba fepe ipa' banagefa fetaga lu'uf a'owa' fikila' pali' panda'afi, gawa inimba ipe'ini ina atiasi nepe dowaf, owa'atin. Atiasi a' netaga nefe' lu'win newalapai waf fasifi hiafi. ⁹Apa' epen mamahina waf afambai akani, anin ina atiasi niti hiahawes sagape lauguni negawas, owa'atin. Anin si'i naep pagaso'ani ea' okom maso'an God NASA'OPANA nagak wahomana waf awafi hiafi anin nali' nanda'afi.

¹⁰Ea' ipa' penda' waf bu'wafi penda' maol banagambel endilisi pindikila' fowa' pali' panda'ana pagaila basef ifimba fowa' God nofalepa nosahe'epa ma pagape ananipai atipa. Penda'as na'amba ma pegegawa endilisi God nofalepa nosaho'epa ea!. I'i ipa' pelam penda'am atapipa, atiasi ina pewa ma anef waf awafi, owa'atin. ¹¹I'i ipa' pigailam, dao' andeande'ma anaf God nonda' uchia'w kogal alihii'wa pendagala pefe' pigawis anamba anen nagala'ambemagoma nagape atapigin lifilafima. Anen atona nagatopalopapa ma dei' magape andeande'i.^d

¹²Endilisi, ipa' pegawa hiahawes isimba ma basef ifimba fagali'i ea' pahapifif banagepa ma basef ifimba endilisifi palutu la'ifipamef. Owa' owa'atin, ae' a'i ata' inda'ipipa atina egasa'ma ukup ipe'ipi ma pendanda'ma basef ifimba.^e

¹³Nimaguf hiafi hi'ilif ae' epe namowe elomepa itap apa'e, okom mandanda' a'l i'ipipa timbi tambela egasa'ma ukup ipe'ipi ma basef ifimba.^f ¹⁴Ae' egawa nogota bandata ma atiasi elamona ambal ae'ali ma sehe egaga' si'i Dembinai ape'inai Jisas Krais nigihimba'me ea!. ¹⁵Isimba atis dei' a'l enda' maol banagambel dondo' ma ikwafa pepel ae'ani enda' ano'w uchia'wa anif nimaguf hiafi ae' egaga', ipa' ukup pendanda'ma basef ifimba pepe pegegawef.^g

Afa' wati banagami mogogala'i Godi magape Kraisi ea'

¹⁶Afa' wa'i pipa ea' pegawa banagami Dembinai ape'inai Jisas Kraisi ma anaf notanima nifi'i nogoloma banagami lu'wami. Apa' afa' ina

^c 1:5 Ga 5:22-23 ^d 1:11 Ju 5 ^e 1:12 2 Pi 3:1 ^f 1:13 2 Ko 5:1; Jo 21:18-19 ^g 1:15 Mt 17:1-5

waila anom basef numunefis dowaf epes gawaisi saga'iami wa'ipipa basef ifimba Kraisi, owa'atin. Afa' watolona endilisi nogofa! banagami mogogala'i fasimi Godi ma naep afa'ipi, isimba atis dei' wa'ipipa.^h

¹⁷Afamba afa' wape wagalomana halafuta atamba, wati anen nofa' agol lu'wagili galoma banagami mogogala'i fasimi ma lagol Ahamana Godi. Nemaf afamba anagol malogol ga'i gatagai God nagapoma gaf'i'mai Jisas ga'i, "Anamba Nogame ae'anai okom magamagailana a'owa'i. Okom ae'ami bo'oma anen." ¹⁸Afa' wape walomana halafuta atamba God nandandepatai bo'wagoma ea' wame' basef ifimba malagol agalemba ga'i gagatagai ilifi.

¹⁹Afa' atofa ukup pandanda'ma basef ifimba God naga'iefi wame'ef afamba wagape halafuta atamba. Basef ifimba fewa' banaga basef fowa' amom profet maga'iefi ea' wahapilif banagef wa'i endilisi atis.

I'i ipa' peme' basef ifimba amamifi ukup kilikala' pepemef, dao' andeande!. Dei' main, basef ifimba si'i anin nagwapin fagandini nape negegala' akoti. Ea' negala' nape atapin nafi'i nataga a' lala. Ama ondo'w kuhimbitai'wi lagalama'wi kogohafili opalef ipe'ilifi nomon. ²⁰Apa' ipa' ata' pendegawa basef ifimba atapipamef. Ina anona profet atotona naila okom ananimi atom dei' na'i anif basef kofagefa amom profet fowa' manda'ef fagail buk Baibeli, owa'atin.ⁱ ²¹Dei' main? Fowa' ina anin epen atitin na'i anif basef mogofa'efa Godi ma okom ananimi atom, owa'atin. Ambal bu'wali Godi atona nasa'mai nomonas amom profeti nasindi'amonam ea' mofa' malagol ananigili ma'i basef ifimba.

Waf amom profet manda'afi baso'afi

2 ¹Fowa' anom profet magambaso'ami mataga la'afena esis amam nematawa Israel mambaso'masa basef baso'ami. Dei' na'amba atin atiasi anom amam magambaso'ami mosafel la'afena ipa' wapani ea' mondambaho' mifi'i mombaso'mepa mi'ipipa basef mamimami hiami baso'ami magahambombaga epesi. Dembinai anen fowa' naga' ma natala amom amamba nagatagwahoma waf awafi ma mogape andeande!. Apa' owa', amom mowa'ana alafugah wapani. Atiasi monda'as na'amba atin, owa' kwafalis atis mohambombaga amom atom motaga aom.^j ²Amom manda'as na'amba atiasi anis amam nematawa hiasi sila waf naninani aunai amamunai. Ea' anis epes daisi siti waf awafi amom magambaso'ami manda'afi ea' sosambala basef bu'wafi si'i basef awafi atifa waf bu'wafi endilisifi Godi.^k ³Amom amamba kowagalami endilisi, isimba atis atiasi monda' basef baso'afi ukup amamipi atip pag'a'iefi ma mogofa' otamba mais ipe'isi. Apa' fowa' God a' nogawa nandandepa anef nemaf fapomam ea' ma nogawalogia amoma anaf higiligalam lamonam.

h 1:16 Mt 17:5 **i** 1:20 2 Ti 3:16; 1 Pi 1:11 **j** 2:1 Mt 24:11; Ju 4 **k** 2:2 Ro 16:18; 1 Te 2:5

God nandondomba anom maifah mogalamona amom endilisii ata' mape atapim mohafa amom. Ina ma'oh molola, owa'atin.¹

⁴God ina niambali^l amom ensel mamahoma fowa' manda' waf awafii, owa'atin. Anen a' nali'amonam miliana wambel awambili hel. Ea' nowa'am sisihim mape atapim anamba akotigima mape masasa nemaf God nogowalogamafi.^m ⁵Anen ina niambali^l esis amam nematawa fowa'isi sogowa' alafugahanai sape andeande', owa'atin. Anen nanda' embel lu'wami matef mahas afis hi'alas. Anen numafi Noa atotona nagawalipasa basef bu'wafi Godii nofa'ana naloma epes 7-pelais wapani nofa'as sotanimai sape andeande!ⁿ ⁶Ea' nahambombaga epes hiasi sagape walemb bialembi lu'walimbi Sodom Gomora wapani. Epes isimba walemb ambalembai God nahagon naofagon nif lu'wafi ea' agambeh atembeh hotawa. Anen nagwamasa waf awafi esis sanda'afi nanda'as si'i anol ametala akafimi lu'wami epes mamahisa sogosambala basef ananifii anaf sogofa'ami.^o ⁷God natopalopa aman anamba bu'unai Lot numafiana nofa'ana notanimai nepe andeande', ina aona lamonana, owa!. Anen okom nimanim endilisima waf awafi so'a waulafi alugufi amom manda'afi, mogosambala basef Godii. ⁸Aman anamba bu'unai Lot nape la'afisa nalomas dondol name'ama waf awafi amom manda'afi nalomam natelef. Okom ananimi a' nimanim a'owa' ma waf afamba amom mogosambala basef Godii manda'afi.^p ⁹Basef ifimba fa'ipapa alihif fa'i Dembinai nugumafi epes bu'wasi sagaila waf ananifii andeande!. Nemaif mamahefa gwamba maim mogatagamas, anen nogawa ea' ma nigili'amasa sogape andeande'ma gwamba amamba. Apa' anen nahapila esis sanda' waf awafii ma nogagwamasa akafimi ma waf awafi esis sanda'afi sope atapis sofe' sotagama nemaf afamba anen nogawalogasafi.^q ¹⁰Basef ifimba endilisi atis fapoma epes mamahisa ukup pegehafema waf alugufi alop atopafi ma ukup pa'i basef Dembinai sagal'i falafifii. Epes isimbai anaf sofa' akafimi lu'wami a'owa'!

Amom magambaso'ami manda' du'wanigama magaila ukup amamipi atipi masa'ma agof amamugufi atogof. Amom ina ombal maham kwasakwasala manda' anom ensel awami magape ilifi findiwam, owa'.^r ¹¹Apa' amom ensel bu'wami banagami endilisi mikila' amom amamba magambaso'ami, amom ina magwas manda' ensel amamba awami findiwam manda' kotimama naep Dembinai, owa'atin.^s

¹²Hiahawes amom magambaso'ami owa' mogogawasia, amom ma'i basef awafima isimba. Amom si'i mafis magail alupi ukup owa' pigapaumia magaila alop atop wafipii. Mememi mola mafis isimba ma anis epes sowando'mam sofa'am soham afum higiligalam ea' na'amba

¹ 2:3 Ju 6 ^m 2:4 Jen 6:1–8:22; 2 Pi 3:6 ⁿ 2:5 Jen 19:24; Ju 7 ^o 2:6 Jen 19:1-16
^p 2:8 1 Ko 10:13; Ju 6 ^q 2:9 Ju 7-8,16 ^r 2:10 Ju 9 ^s 2:11 Ju 10

atina amom amamba wapani anaf awasim higiligalami.^t ¹³ Amom manda' waf naninani aunai maso'as akafimi anis epes daias. Ea' anaf God nogwamama mogofa' akafimi wapani. Amom ukup pandanda'ma waf afamba saga' gwa'aisi embel maisafi faloma waf awafi so'a waulafi a sonohas endilisi ma sonda' waf afambai alip. Ea' ma' gwa'aisi maloma ipa!, apa' waf awafi amamifi si'i anal ametal aluguli awali la'afena ipa!. Amom mape malomepa mandagalama waf awafi amom manda'afi.

¹⁴ Dondol naep amamipi petaoma nematawa wanda' waf awafii lifilafi ma monda' waf awafi mogalomawa, amom ina makwaha waf afamba, owa'atin endilisi. Amom maga'l'iipa anis epes daiasa mombemefas sonda' waf awafi. Amom mogawa endilisima waf afamba awafi kowagalasafi ma hiahawes anis epes daiasi. Anaf God nohambombagam endilisi.^u ¹⁵ Amom mowa' alafugaha ufia'w usi'l'iwi, isimba atis dei' ukup paolam a'owa!. Amom maila waf anona aman Balami, Beor nogamana. Anen okom mohafela nanda' waf awafi ma nogofa' otamba hiambai.^v ¹⁶ Owa' neme' basef banagafi fa'ipana dindinipa nogokwaha waf afamba awafi. Basef ifimba donki ananini atin nega na'ipanaef si'i epen naga'l'i nasopama ufia'wa waf afamba awafi ukup pagahasafi profet anamba na'i nond'a'afi.^w

¹⁷ Amom amam na'ambaimi si'i waiwa amamba magal mogowalai itapi embel akami. Amom mandahama si'i ilagw fufin lu'unai nufapusam nawalom magafe' atona biana daindai. God nandondonba akot lu'unai endilisi alialina a'owa'i ma anaf amom mogapaogon.^x ¹⁸ Amam amamba manda' du'waniga gigal ma'oh dowadowafa basef falafalafifi awafi amamifi. Amom maga'l'iipa anis epes daindaiasa waf ukup pigahafemafi ma so'a waola waf naninani aunai alop atopi. Amom manda' waf afambai ea' mambemefa anis epes ata' dei'aol sataga sa'i sogakwaha waf awafi epes isimba sogololama Godi sanda'afi ea' mambemefas saila amom.^y ¹⁹ Amom ma'ipa anis epes ma'i, "I'i ipa' pila basef afa'ifi, dao' ipa' atiasi pepe andeande'ma ina anis maefah sowasi'ipa, owa!. Pepe wahifipa."

Apa' owa' amom magape lafela waf awafi, amamba mawasi'am sisihim. Dei' main, i'i anis maefah sombemefa anin epen, atiasi epen inimba ea' atapin nepe lafela hiahawes isimba sagambemefani.^z ²⁰ I'i epes mamahisa sokwaha waf awafi hiafi itapafi fanda' epes awasii sogogawa Dembinai ape'inai Jisas Krais nowambelapa mogotanimai, ma i'i waf afambai awafi fehekela esis wapani ma fiwasilas sisihisa, anaf asope atapis na'amba. Sagali' sape awasis sisihisa waf awafi, ata' sape awes kwasakwasala. Apa a'i owa' sagi' sanda' waf awafi wapani, ea' sape sisihis awes endilisi ma waf awasifi.^a ²¹ I'i esis ina sofa' gawa ma ufia'w akwamba ma owa' sogawa mu'uli bu'wani Godia, ata' sope awasis kwasakwasala. Apa' dei'

^t 2:12 Ju 12 ^u 2:14 Nam 22:7; Ju 11; Re 2:14 ^v 2:15 Nam 22:28-35 ^w 2:16 Ju 12-13
^x 2:17 Ju 16 ^y 2:18 Jo 8:34 ^z 2:19 Mt 12:45 ^a 2:20 Lu 12:47-48

sowa' alafugahana ea', anaf sope awes endilisi a'owa'.^b ²²Waf afambai fagatagamasi asi'i anif basef endilisifi epes gawaisi saga'iefi faga'li na'amba fa'i, "Nombat totanima tafe' taga' tagago'wami atatimi wapani."

Anif wapani faga'li, "Bol lafe' lasa'of ea' ma main, owa' lotanima lafe' lambani itap walambuf folo'wagalagoma wapani."

Endilisi atis Dembinai notanima nogafi'ii

3 ¹Ipa' alipipai endilisi, basef ifi'i fagafe'ma bifi anda'ef fagail okwatih i fafe'mago ipa!. Basef ifimba biafif fagali'i faloma ifi'i ase'epaef ipa' ma fegasa'ma nomonas fasisi ipe'isi ma pegegawa basef ifimba.^c ²Ea' ae' a'i ipa' ata' ukup pendanda' wapani ma basef ifimba fowa' amom profet Godi magawalapafi. Ea' ukup pendanda'ma basef banagafi Dembinaii, nowambelapa mogotanimaii, ipa' ea' pegefa'ana lagof afa' aposel ipe'ifai.^d

³Ipa' ata' ukup pagawa isimba sindali'. Nimaguf ifi'i fagagi'i anom amam monda'iafpai motaga migi'ma ukup awapi amamipi ma waf amamifi. Ea' monda'iafpia na'amba^e ⁴mi'i, "Anen na'i basef endilisifi atif na'i nogafi'i wapanii. Apa' dei' anen ata' nape ani? Nogota fowa' dambadamba bafasapa sagaga'atai hiahaom amamba hiami hi'alam ata' mape atapim na'amba atin si'i fowa' dambadamba itap apa'e pagataga mafili' mataga dei'."^f

⁵Apa' nomonas amamisi mandaiwa', dei' owa' mogawa hiahawes isimbaia, owa'atin. Amom ina ukup pandanda'ma fowa' gani God na'i atina nanda' itapi otaga sataga sagape, owa!. Anen nanda' itap pandahi' pataga pape la'afena embel.^g ⁶Owa' God nanda' embel lu'wami mataga itap maofanap hi'alap mahambombaga epesi hiahaom magape itapi hi'alam. ⁷Basef Godi ea' ifimba atif dei' fili'ama hiahaom magape ilifi maloma epes saloma hiahaom magape itapi hi'alam dei' ata' mape atapim masasa nif fegandom nemaf afamba God nogawalogia epes isimba sogowa' alafugaha anini ma nonda'as higiligalas.^h

⁸Ipa' alipipai endilisi, ipa' owa'i ukup pese'epama anis hiahawes atifisa. Okom Dembinaii na'i nemaf atetef a' si'i afagof hiagufi 1,000-pelaiguf ea' afagof 1,000-pelaiguf fandahama si'i nemaf atetef.ⁱ ⁹Dembinai ina nanda' maol lalag atina nogawalapai hiahaom anen okom mandanda' na'i endilisi atisa nonda'ami si'i anis epes ukup pandanda'ma maol sanda'an lalag atin, owa'atin. Anen nandaiwa'ma anin epen atitin higiligalan. Anen okom ma'l epes hiasi hi'ilas sombema nelelemb sondafe'ma anen. Isimba atis dei' anen okom mapoma ipa' dei' nape nasasaipa palomas.^j

^b 2:21 Pro 26:11 ^c 3:1 Ju 17; 2 Pi 1:13 ^d 3:2 1 Ti 4:1; Ju 18 ^e 3:3 Ais 5:19; Esi 12:22; Mt 24:48 ^f 3:4 Jen 1:6-9 ^g 3:5 Jen 7:11-21; 2 Pi 2:5 ^h 3:7 Sam 90:4 ⁱ 3:8 Hab 2:3; 1 Ti 2:4 ^j 3:9 1 Te 5:2; Mt 24:29,35

Anaf itapi otaga ilif ama'e ahigililam hi'ilam

¹⁰Apa' nemaf Dembinai nogafi'afii anaf fifi' si'i epen nanda' wali nagafi'i. Nemaf afamba otaga bendagola mehip ahigililam. Ea' hiahaom amamba hiami magapaunai wapani atiasi ea' fendom fesopamam hi'ilam. Itap apa'e wapani peloma hiahaom hiami sanda'am magape itapi anaf nif fendom fesopamam hi'ilam. ¹¹Endilisi hiahaom amamba anaf higililam hi'ilam na'amba. Apa' ipa' atiasi penda' main? Ipa' pepe pindaila waf usi'ifi bu'wafi hilili'i atef ea' pila waf hiafi Godi.^k ¹²Ipa' penda'as na'amba ukup dag pepe pendehafa nemaf lu'wafi Godi, pendanda' maol ananini banagambela pegemaso' nemaf afamba fegataga. Nemaf afamba atef anaf otaga fendena fitai'wana ea' nif lu'wafi a'owa' fendo hiahaom amamba hiami magape otagai hi'ilam motaga mumbul mefe! si'i embel.^l ¹³God na'i basef endilisifi atifa nonda' otagai itap dambaisi ma waf usi'ifi atef fegapaogoma. Apa' dei' ea' ukup dag mape mohafa isimba atis.

Apa' mundumafuma andeande' ukup dag mope mohafa nemaf Dembinaii

¹⁴Alipipai ae'ipai endilisi, ipa' ukup dag pape pegehafa hiahawes isimbai. Ea' ipa' pendanda' maol banagambel pindimafi ipa' pegape be'epa hilili' andeande'ma waf awafi akepa ma naep Godi, pape opaf atof pegalomana.^m ¹⁵Dembinai ata' nimanis nape nasasa apa' epes hiapai hi'alapa. Ea' dei' ipa' ukup pendapoma basef ifimba anen nowambelapa mogotambili. Isimba na'amba atin si'i basef ifimba hiafi sahomapa Pol apa' ukup pagapagailanai nanda'ef fagafe'ma ipe'i. Anen nanda' basef ifimba ma gawa bu'wami endilisi God nagaso'anani. ¹⁶Aho' basef hiafi anen nanda'afi ma nemaf afamba Dembinai nogafi'afii nanda' ifimba atif. Apa' anif basef nanda'ef fagail buki ahifif endilisi ma mogogawa kofagefa. Basef ifimba ahififi, epes isimba gawa akasi ma owa' sugalutu banagesia isimba salalamona basef ifimba faloma anif daif hiafi wapani fagail Baibeli. Ea' esis atis sandahambombaga esisa anaf lamonas hi'igalas.ⁿ

¹⁷Alipipai endilisi, ipa' pegawas ea' hiahawes anaf sigi' sogatagai. Ea' pindumafuma andeande'. Na'amba amam amamba magambaso'ami ma mogosambala mu'uli Godi mohondo'epa pewa ma anef waf awafi.^o ¹⁸Apa' ipa' pape waf afamba Dembinai Jisas Krais nagatopalopapa dowafafi, nowambelapa mogotanimai pegawaf ea!. Ea' pendalutu banagepa ma waf afamba feloma gawa inimba Kraisi pindikila' fowa' pali' pape panda'as. Ae' a'i agol lu'wagili fasigili atogol dei' atapigil gopomana gofe' anaf owagama wapani. Endilisi.

^k 3:11 Ais 34:4 ^l 3:12 Ais 65:17; Ais 66:22; Re 21:1,27 ^m 3:14 Ro 2:4; 2 Pi 3:9

ⁿ 3:16 Mk 13:5,33; 1 Ko 10:12 ^o 3:17 Ju 25